

**Kolosi**  
**Naoa itəm Pol təmäte tuwin kəm**  
**iəfak min ikin Kolosi**  
**Nəghatən əkuəkir rəha naoa u**  
**Kolosi**

**?Pah təmäte naoa u?** Aposol Pol təmäte naoa u.

**?Təmäte tatuwin kəm pah?** Təmäte tatuwin kəm niməfak əpəh Kolosi, taon asol kit əpəh nitən asol Esia.

**?Nəmegəhən tahro nulan nian təmäte?** Katən məmə okəm-naka Epafra təmätuoun niməfak əh Kolosi. Pol təsuwinən məplan niməfak əh, məto iəgətun eiueiua neen kəmotuwa e niməfak. Koatən məmə okotəkəike kətəu-pən suatip neen rəha nagwənən ne nənimən, kən kəfak kəm nagelo min, moatən məmə Kristo in sənəmə ilis pik. Koatən məmə koatos nitunən neen itəm koatəhluaig, moatən məmə nitunən ne nolən rəha etənim in nat kit itəm iahgin pik.

**?Təmäte naoa u o naka?** Pol təmäte naoa u məmə otoh nəgətunən eiueiua min itəm koatatig e niməfak. Molkeike məmə otən-iarəp məmə Kristo in ilis taprəkis-in natimnat rafin, kən iəfak min okəsotagileən e nəgətunən eiueiua min əh, məto-inu ilat nat əpnəpin əm.

*Pol təmätuoun rəhan nəghatən*

<sup>1</sup> Io Pol, u io aposol kit rəha Kristo Iesu, itəm Uhgin təmitəpun rəkis io məmə rəhan. Itimlau piətat Timoti etuatig, <sup>2</sup> kən nikitimlau tətagien

māmə iatuəghat kəm itəmat e naoa u, itəm iatuəte matuahl-ipinə kəm itəmat netəmim rəha Uhgin əpəh Kolosi, inu piak min ne winik min e Kristo itəm nakotahatətə əskasik lan. Itimlau iatuəfak māmə nəwīrən ne nəməlinuən rəha Uhgin Tata rəhatat in otəkəike mətətig otəmat.

*Pol təmənwiwi Uhgin o netəm Kolosi*

<sup>3</sup> Nian ekoatəfak otəmat kəm Uhgin u tata rəha Iəramərə Iesu Kristo, kən nian rafin ekoatən tagkiu kəm in o rəhan wək e nəmegəhən rəhatəmat, mətə-inu emotəto <sup>4</sup> māmə rəhatəmat nahatətəən təkəsik ron ne nolkeikeən rəhatəmat tatuwin o netəmim itəm koatəfak. <sup>5</sup> Nahatətəən ne nolkeikeən rəhatəmat tol min-nulan mətə-inu nəkotitun wir e nikitəmat māmə Uhgin otos-ipinə kəm itəmat nat naka itəm in təmol əpen-əpenə lan əpəh ilis e nego e neai. Nəmotəto rəkis natimnat min əh e nəghatən pahrien, inu namnusən təwir rəha Iesu Kristo. <sup>6</sup> İkin min e nətueintən u, namnusən təwir tatəe-in noan matəwiə matol wi nəmegəhən rəha netəmim. Tol əm mə inu nian itəmat nəmotəto motitun nīpahrienən əh e nəwīrən rəha Uhgin, kən tatəwiə min matəe e rəhatəmat nəmegəhən. <sup>7</sup> Inu suah u Epafra, tinən rəkis nəghatən u kəm itəmat. In etəmim wir kit itəm tatos rəhatimlau nəghatən. In etəmim kit tatətul əskasik o nolən wək rəha Kristo kən mətəsitə etəmat. <sup>8</sup> In təmən kəm itimlau nolkeikeən rəhatəmat itəm tatuwin o netəmim itəm Narmīn Rəha Uhgin təmos-ipinə kəm itəmat.

<sup>9</sup> Tol min-nulan, e nian itimat emoatəto namnusən əh, kən ekoatəfak e nian rafin otəmat.

**1:4:** Efes 1:15-16

**1:6:** Efes 1:13; 1 Pita 1:4

**1:8:** Kol 4:12;

FIm 23

Ekoatətapəh-in o Uhgin məmə in otətəlmin itəmat e rəhan nətəligən ne nenatigən pəs nəkotitun wir nəwian. <sup>10</sup> Ekoatəfak nulan məmə naliwəkən rəhatəmat otos-ipən nisialien kəm Uhgin pəs tol nikin tətəgien ron. Məto-inu nəmegəhən rəhatəmat tatəe-in noan itəm təwir o wək rafin rəha Uhgin itəm noatol. Pəs Uhgin otasitu etəmat məmə nəkotitun wir in. <sup>11</sup> Ekoatəfak məmə nəsanənən asol rəha Uhgin otol itəmat nakotəsanən e nian nəratən tatuwa. Pəs nəkoatətul əskasik kən nətəligən rəhatəmat təfəməh, kən nagienən tətətig etəmat, <sup>12</sup> kən nakoatən kəm Tata Uhgin məmə nikitəmat tətəgien o natimat itəm təmol. In təmol itəmat nəkotətuatip, məmə nəkotitun nosən nautə rəha Uhgin itəm otəpanuwa. Onəkotos rəhatəmat nautə tahmen e netəmim rafin itəm koatəfak motaliwək e nəhag-əhəgən rəha Uhgin. <sup>13</sup> Kən Uhgin təmol nəhlan nian in təmiləs-irəkis kitat e nərəməərən rəha napinəpən, minol kitat kinotuwa e nərəməərən rəha Nətin itəm in tolkeike pik. <sup>14</sup> Kən nətin təmikis kitat e nalpənən rəha təfəgə, inəh təməfəl kitat e təfəgə rat min rəhatat.

*Kristo in ilis taprəkis-in  
natimnat rafin*

<sup>15</sup> Nəti Uhgin tahmen-pən əm e rəhan tata itəm kol netəmim kəsotehmən.

Aupən aupən ağin, nian nıməptən ne neai ne natimnat rafin kəmoatikə əh, məto Nətin, in

---

**1:9:** Efes 1:16-17

**1:11:** Efes 1:19; 3:16

**1:12:** Efes 1:11,18

**1:13:** Luk 22:53; Efes 2:2

**1:14:** Efes 1:7

tinimaupən matig rækis, kən tol-pən in, in ilis tatəramərə o natimnat rafin mīn u.

16 In ilis mətə-inu in təmol natimnat rafin e nətueintən u, ne neai, natimnat itəm katehm ilat o kəsehmən ilat, inəh nagelo mīn, ne iərmis mīn, ne narmin rat mīn, ne iəramərə mīn rafin. Kən in təmol natimnat mīn rafin u məmə rəhan.

17 Kən in tinimaupən matig rækis e natimnat rafin. Kən natimnat mīn rafin koatətig mətə-inu nəsanənən rəhan tətəskəlīm ilat.

18 Kən in əm tatətul aupən o niməfak, kən niməfak in tatol wək tahmen-pən e nīpətin, kən in rəhn-kapə.

Kən in nəukəti niməfak, inəh in etəmim itəm in təmaupən məmegəh lilin e nīmīsən.

Tol nəhlan, in ilis e natimnat rafin.

19 Mətə-inu e nəwia Uhgīn, nəmegəhən ne nəsanənən rafin rəhan tətətig əm e Kristo, kən Kristo in ilis e natimnat rafin.

20 Kən e Kristo, Uhgīn təmələhəu nəməlinuən nian nīta Kristo təmaiu e nig kəməluau, kən nətəmim, ne nat megəh mīn, ne nagelo mīn, ne iərmis mīn, ne natimnat rafin kəmotuwa kuəfīmīn ilat mīn e nəramərəən rəha Uhgīn.

E Kristo əm Uhgīn təmol natimnat mīn əh.

21 Aupən ikin, itəmat nəmoatətul isəu o Uhgīn, kən itəmat tikīmīr mīn rəhan e nətəligən rəhatəmat, kən nəmoatol təfagə rat. 22 Mətə roiu əh, Uhgīn təmol məmə itəmat nəmotuwa kol kitīəh itəmat mīn e nīmīsən rəha Kristo itəm nīpətin təməkəl e

1:15: Jon 1:18; 2 Kor 4:4

1:17: Jon 1:1; 8:58

1:18: Wək

26:23; Efes 1:22-23; Nəl Əpən 1:5

1:19: Kol 2:9

1:20: Efes

1:10

1:21: Rom 5:10; Efes 2:12

nig kəməluau. Uhgin təmol mihin əh lan məmə otos itəmat nakotuwa iuəhkir ron, kən motətuatip e niganəmtin, kən rəhatəmat nolən rat tikə, kən okol suah kit təsən ratən itəmat. <sup>23</sup> Natimnat min u tol nəhlan okəmə itəmat nəkoatətul əskasik e rəhatəmat nahatətəən e Iesu. Nəmoatəto namnusən təwir itəm tatəgətun natimnat itəm Uhgin otol kəm itəmat əpəh e nego e neai, kən rəhatəmat nətəligən otəkəike matətul əskasik e natimnat min əh. Namnusən təwir u, itəm nəmotəto rəkis, kəmamnus-iarəp ikin min e nətueintən, kən io Pol, Uhgin təmaun-in io məmə iatən-iarəp namnusən təwir əh.

<sup>24</sup> Nikik tagien məmə ekatəto nahməən e nipətik o rəhatəmat nahatətəən. Kristo təməto nahməən e nipətin məmə niməfak otaiir. Kən e suatip kitəh əm, io min iatəto nahməən e nipətik o nipəti Kristo, inu in niməfak, məmə otəwiə məskasik. Kən tol min-nəhlan, wək itəm Iesu təmətuoun, iakolkeike məmə iakasitu e wək rəha Iesu o niməfak, kən matəto nahməən ron.

<sup>25</sup> Uhgin əm təmiləs-ipər io məmə ekol wək e niməfak rəhan. Roiu əh, ekitun nasituən etəmat o wək itəm Uhgin təmələhəu-pən e nelmək. Rəhak wək məmə iatən-iarəp nəghatən min rafin rəha Uhgin pəs nəkotitun wir, <sup>26</sup> nəghatən əh in nalpəkau anionən rəha Uhgin itəm təmatəhluaig o netənim rafin aupən ikin, məto roiu əh Uhgin tinuhapik nipətin kəm rəhan netənim. <sup>27</sup> Kən Uhgin nikin tagien əm məmə otən-iarəp natimnat wir min rəha Iesu kəm itəmat, netəm naihlua min u kəsənən mə itəmat netəm Isrel, məmə onəkotitun

min. Nalpækau anionən itəm təwir rəha Uhgín, in tol min-nulan, Kristo tamos nikitəmat, kən nəkotitun motahatətə lan məmə onəkotos rəhan nəwirən itəm təwir agin-əh əpəh e nego e neai. <sup>28</sup> Kən itəmat ekoatən-iarəp Kristo kəm netənim rafin. Kən ekoatən əskasik moatəhgaiir e nikilat, kən moatəgətu ilat e nenatigən wir, məmə ilat kotuwa iəfak min itəm koatətul əskasik e rəhalat nahatətən e Kristo. <sup>29</sup> Iatol wək əskasik o nat əh, kən e nian rafin iatol wək əskasik pik e nəsanənən asol rəha Kristo itəm tatol wək e nəmegəhən rəhak.

## 2

### *Nəkotəkəike motahatətə əskasik e Iesu*

<sup>1</sup> Iakolkeike məmə nəkotitun mə iatol wək əskasik pik otəmat netəm Kolosi, ne netəm Laotisia, ne neen min itəm koatəfak məto esəhmən ilat. <sup>2</sup> Iatol wək nəhlan o niləs-ipərən nətəligən rəhatəmat rafin, nian itəmat nakotilpin wir nikitəmat məmə nikitəmat otol kitəh əm, kən natimnat min u in tatuwa nian nakoatolkeike itəmat min. Kən iatol wək məmə itəmat rafin onəkotos nitunən təwir itəm otol nikitəmat təsanən, kən in otol min məmə nəkotitun wir nəghatən pahrien rəha Uhgín itəm aupən təmatəhluaig məto roi u tinet-arəp. Kən nalpækauən anion əh, in Kristo, <sup>3</sup> itəm Uhgín təmərgətain nenatigən ne nitunən wir min rafin rəhan tətətig lan. <sup>4</sup> Io iatəghat nulan kəm itəmat o nahtosig-inən nəghatən eiueiuə min rəha netənim itəm tətəhen o niuw-rəkisən rəhatəmat nətəligən. <sup>5</sup> Tol mə etətig pap isəu otəmat, məto nikik tatəht pik itəmat. Kən nikik tagien pik məto-inu eməto

məmə rəhatəmat nətəligən kitiaḥ əm, kən itəmat nakotahatətə əskasik əm e Kristo.

*Rəhatəmat nəmegəhən otəkəike mətatig əm e Kristo.*

<sup>6</sup> Məto-inu itəmat nəmos Kristo Iesu məmə in İərəməmə rəhatəmat, kən nəkotəkəike moatətəu-pən əskasik in. <sup>7</sup> Otaskəlīm Kristo tiəkis tahmen e noki nig tateiuaiu mīləs nəptən, kən pəs rəhatəmat nəmegəhən təwiə məskasik lan. Pəs rəhatəmat nahatətən otəkəike məwiə mətaskasik e nian rafin, nahatətən inu kəməgətun itəmat lan aupən. Kən nian rafin okotəike moatən kəm Uhgīn məmə nikitəmat təməmə mərioah e nagiənən o natimnat itəm təmol otəmat.

<sup>8</sup> Oatəto wīr itəmat məmə netənim kəsotatuən itəmat e iəgətun eiueiuən rəhalat. Nəgətun eiueiuən əh tatətəu-pən nətəligən rəha netənim əm ne nəukəti lou mīn itəm tatəghat-in natimnat rəha nətueintən əm. Nəghatən mīn əh tətisi-pən o nətəligən oas mīn rəha netənim, məto kəsotisi-pənən o Kristo.

<sup>9</sup> Kən Kristo in Uhgīn. Kən in təmuwa mos nīpəti etənim tahmen e kitat, kən natimnat rafin rəha Uhgīn tətətig lan.

<sup>10</sup> Kən nian nəmotahatətə e Kristo, kən Uhgīn in təmos-ipən natimnat rafin rəha nəwīrən kəm itəmat. Kən Kristo tətərəməmə e netənim ne natimnat rafin itəm koatərəməmə e nətueintən ne neai. <sup>11</sup> Kən nat kit mīn e Kristo, nian itəmat nəmotahatətə lan, kən in təməhg-ipən itəmat. Məto sənəmə nəhg-ipənən rəha nīpətin itəm netənim koatol, məto nəhg-ipənən rəha nikitəmat itəm

Iesu tatol. In tæmæte rækis nætəligən ne nolən rat min e rəhatəmat nəmegəhən. <sup>12</sup> Kən e nian itəm kəmau-təlimin itəmat e nəhau, in nəmtətin kit məmə nəmegəhən aupən rəha təfagə rat rəhatəmat koatimis kən katitənim ilat Iesu, kən Uhgin təməmegəh min e nəmegəhən wi min itəmat Iesu e nəmegəhən rəhatəmat, in əh e nahatətəən rəhatəmat e nəsanənən asol rəha Uhgin itəm təmol Iesu təmegəh min e nimisən.

<sup>13</sup> Aupən ikin, nian Uhgin təməsəte rəkisən əh nolən rat min e nikitəmat, kən e niganəmtin, itəmat nəmotimis rækis o nolən rat min əh. Məto nian nəmotuwa kol kitəh itəmat Iesu, kən Uhgin tosmegəh min itəmat min. Uhgin təmafəl rækis nolən rat min rəhatat. <sup>14</sup> Nian kitat kəmoatol nolən rat, kən kəmotəht Lou rəha Moses itəm tatən məmə okotimis o nolən rat min əh, kən tatətu-pa nipəgnəmti nəghatən min kəm kitat. Məto Uhgin təməht-ipən nəghatən min əh e nig kəməluau, kən nəsanənən rəhalat tikə. <sup>15</sup> E nig kəməluau-in, Kristo in təmol win e nəsanənən rəha iəməmə min rafin, kən təmərəkən nərəməməən rəha iərmis min tahmen-pən mə in təmol win elat e nəluaginən asol kit. Kən roiu əh, in təmol rəhan tikimər min kəmotuwa nat əpnəpən əm e niganəmti netəmin.

### *Iesu tatəməmə etəmat*

<sup>16</sup> Tol min-nulan, əsotətəlig-inən nəghatən rəha netəmin itəm kotələhəu-osig məmə nəkəsotolən natimnat neen, məsotunən nagwənən u o məsotənimən nat u. Əsotətəlig-inən nəghatən rəhalat itəm koatən məmə nakol natimnat min

u e nian asim min, o e nian rəha məwig wi min, o e nian rəha Sapat. <sup>17</sup> Lou min u rəhalat itəm koatəghat-in, kotahmen e narmi nat kit itəm otəpanuwa, məto nipəti natimnat rafin tətətig e Kristo. <sup>18</sup> Netənim neen kotausit pik məto-inu ilat koatən mə koatehm nəməhlaiirən min neen itəm nipətilat tatig. Ilat koatən kəm itəmat məmə nəkotəkəike motol natimnat neen itəm tatəgəhun məmə rəhatəmat nətəligən teiuaiu, kən itəmat onəkotəkəike moatəfak kəm nagelo min. Əsotətəu-pənən nətəligən min rəhalat. Nətəligən min əh etənim əm tatol. Okəmə nəkoatətəu-pən nəghatən rəhalat, kən onəkotəkəih e rəhatəmat nəmegəhən. Məto-inu netəm min əh koatos-ipər ilat o nat nipətin tikə. <sup>19</sup> Netəm min əh kəsotəskəlīmən Iesu tiəkis. Məto Iesu tahmen-pən mə in rəhn-kapə niməfak kənu niməfak in nipəti Iesu. E nolən kitəh tahmen-pən e nipəti etənim, itəm tatilpin ikin e noanol min tatuwin e nikilkilin, kən Iesu tatol mihin əm nat kitəh e niməfak rəhan mə niməfak otəskasik, kən matəwiə e nəmegəhən wir itəm Uhgən tatol tatəwiə.

*Nəmos nəmegəhən wi məto-inu itəmat nəmotol kitəh e Iesu*

<sup>20</sup> Nian nəmotahatətə e Iesu, in tahmen mə nəmotimis itəmat min. Kən məto-inu lou təsuwinən o etənim itəm təmimis, kən nəukəti lou min itəm tatəghat-in natimnat rəha nətueintən əm, nəsanənən rəhalat tikə məmə okotərəməmə etəmat. Tol min-nəhlan, iatətapəh otəmat məmə, təhro itəmat nəkoatətəu-pən lou min rəha nətueintən ne, inəh nəghatən oas min itəm koatən məmə,

21 “Əsaskəlīmən nat u,” o “Əsun asgəwīnən nat u,” o “Əsekən nat u.” 22 Məto nəghatən min u təmisi-pən əm e nətəligən rəha etəmim. İlat koatəghat-in əm natimnat rəha nətueintən u, təhmen-pən e nəgwənən neen, ne nənimən neen. Məto natimnat min un, okol təsasituən, kən təsərəkīnən nikitəmat, məto-inu e nian onəkotos o nakotun, kən tikə min. 23 Ekitun mə nian nakoatehm nəghatən min əh, nakotəmə kətah nəghatən agin-əh min neen. İlat koatən məmə netəmim okotəfak min-nulan o nəhlən, kən ilat koatən məmə okotol rəhalat nətəligən teiuiu min-nulan o nəhlən, kən ilat koatən min məmə netəmim okotəike moatehm wir nīpətīlat min-nulan o nəhlən e nolən itəm in tiəkis o nīpətīlat. Məto iatən-ipinə kəm itəmat məmə nəghatən min əh, rəhalat nəsanənən tikə məmə otahtosig-in nətəligən rat min ne nolən rat min itəm netəmim koatol e nīpətīlat.

### 3

1 Məto-inu Ughin təmosmegəh min itəmat min Kristo, kən tol mihin nəhlən, roiu əh itəmat onəkotəkəike motol nikitəmat tətətig əskasik e natimnat itəm tətətig əpəh e nego rəha Ughin, ikin əh İesu tətəpələh ikin e nikali Ughin matip, ikin əh, ikin rəha nəsanənən ne nisaiiən. 2 Itəmat onəkotəkəike motol rəhatəmat nətəligən tətətig əm e nego rəha Ughin, pəs nətəligən rəhatəmat otəsətigən e natimnat rəha nətueintən u, 3 məto-inu itəmat nəmotimis itəmat Kristo, kən nəmegəhən pahrien rəhatəmat koatəhluaig ilat Kristo itəm tətətig e nego e neai ilau

---

2:21: Kal 4:3,9; 1 Tim 4:3

2:22: Mat 15:9

3:1: Mak 12:36;

16:19; Efes 1:20

Uhgin. Nəmegəhən wi u, netəmim kəsotəplanən.  
<sup>4</sup> Nəmegəhən pahrien rəhatəmat in e Kristo əm.  
 Kən nian Kristo otitəlig-pa min, kən Uhgin otəgətun  
 Kristo kitat min kəm netəmim rafin, kən ilat  
 okotəplan nəwirən ne nəsanənən rəhan.

### *Suatip ətuatip*

<sup>5</sup> Məto itəmat onəkotəkəike motapəs agin nolən  
 tərət min rəha nətueintən, nolən tərət tol min-  
 nulan: nīpitan ne nəman ne, koatit anion ilat min;  
 ilat koatol nolən tərət tol naulisən o nənən; ilat  
 koatolkeike pik ilat min o nolən tərət; təfagə rat  
 tepət e rəhalat nətəligən; ilat naumis, kən nolən  
 əh tahmen-pən məmə koatəfak kəm narmi nat  
 min. <sup>6</sup> Nolən rat min əh tatol niki Uhgin titahmə,  
 kən in otol nalpinən asol kəm netəmim itəm  
 koatol nolən rat min əh. <sup>7</sup> Aupən ikin, nolən rat  
 min əh koatərəməmə e rəhatəmat nəmegəhən.  
<sup>8</sup> Məto roiu əh, nəkotəkəike motos-irəkis ilat  
 e rəhatəmat nəmegəhən, kən tol min-nəhlan:  
 nikitəmat təsaratən; nikitəmat ne nohlitəmat  
 təsatipərəh pikən tahmen e kaluəluə; əsolən  
 tərət kəm netəmim; əsən ratən netəmim; əsənən  
 nəghatən itəm tol naulisən o nənən. <sup>9</sup> Soteiua-  
 inən itəmat min məto-inu itəmat nəmotapeg rəkis  
 nətəligən oas rəhatəmat kən motapəs rəhan nolən  
 min, <sup>10</sup> kən nəmotuwın-in nətəligən wi. Uhgin  
 tatos-ipinə nəmegəhən wi u kəm itəmat, matol  
 məmə itəmat onəkotuwa motol əm mə in ne. Kən  
 pəs nəkotitun wir in. <sup>11</sup> Məto e natimnat min əh,  
 in nat əpnəpin əm okəmə ik etəm Isrel, o sənəmə

---

**3:3:** Mat 6:33    **3:6:** Rom 6:6,11; Efes 4:19; 5:3-6    **3:8:** Efes  
 4:25-29; 5:4    **3:9:** Efes 4:22,25    **3:10:** Efes 4:24

ik etəm Isrel; okəm kəmähg-ipən ik o kəsähg-ipənən ik; okəmə nəmöl-wir skul o nəsöl-wirən skul; okəmə ik slef əm kit o ik nakatərəməərə e netəmim. Məto nat asol in Kristo, kən tətətig min e nəmegəhən rəhatat rafin.

<sup>12</sup> Uhgin təmolkeike itəmat, kən mitəpun itəmat məmə rəhan min. Kən tol min-nulan: onəkotəkəike motasəkitun netəmim; motol təwir kəm netəmim; rəhatəmat nətəligən otəkəike mətətig ləhau; itəmat netəm mətig; kən nətəligən rəhatəmat otəfəməh. Otol nəghatən min əh, təhmen-pən mə nakoatuwin-in napən wir rəha Uhgin. <sup>13</sup> Nian suah kit otol nat kit otəsahmenən e niganəmtitəmat, kən nikitəmat otəsahmə uəhaiən ron. Okəmə suah kit tatol tərət kəm itəmat kit, pəs in otos əm timis e nikin, məto in otəkəike maluin kən in mol təwir əm kəm suah un. Saskəlīm-iəkisən e nikim nolən tərət rəha etəmim itəm təmol kəm ik, məto ol təwir əm kəm in, təhmen-pən əm mə lərəməərə təmisaskəlīm-iəkisən nolən tərət rəhatat e nikin, məto in təmol təwir əm kəm kitat. <sup>14</sup> Nat kəike itəm otəkəike matig e nikitəmat, in nolkeikeən. Otos motuwīn-in təhmen-pən mə napən wir rəha Uhgin. Nian onəkotolkeike itəmat min, kən tol itəmat nakoatuwa kitəh. <sup>15</sup> Otos nəməlinuən rəha Kristo pəs in tatərəməərə e nikitəmat, məto-inu Uhgin təmaun-in itəmat məmə nakotuwa kol kitəh, kən nakoatatig əm e nəməlinuen. Kən nian rafin otən kəm Uhgin məmə nikitəmat tətəgien o natimnat itəm in təmol kəm itəmat.

<sup>16</sup> Otəgətun itəmat min e nəghatən rəha Kristo, kən moatən e nətəligən təwir kəm itəmat min

məmə nəkotəkəike moatol, məsotapəsən. Otan napuən min e Naoa rəha Napuən, ne napuən min rəha niməfak, ne napuən min itəm tatisi-pən e Narmin Rəha Uhgın. Otan ilat rafin tahmen-pən e nənwiwiən kit itəm tatisi-pən e nikitəmat matuwın kəm Uhgın. İnəh e nolən min əh, pəs nəghatən wir rəha Kristo tətətig matəmegəh matəwiə wir e nikitəmat e nian min rafin. <sup>17</sup> Natimnat rafin itəm noatol, ne nəghatən min rafin itəm noatən, məto nəkotol əm e nərgi İərəməərə İesu. Kən nian rafin itəmat onəkotəkəike motən kəm Uhgın, tata rəhatat, məmə nikitəmat tətəgien o natimnat itəm İesu təmol kəm itəmat.

*Nolən wi rəha tata, ne mama, ne nisualkələh*

<sup>18</sup> Nipitan, otisiai-in nəərəməərən rəha iaguihl min rəhatəmat, tahmen-pən əm mə pətan u in iəfak in otəkəike mol mihin.

<sup>19</sup> Kən nəman, otolkeike rəhatəmat nipitagwəhl, kən motol təwir kəm ilat, məto əsotolən rəhatəmat nəərəməərən məmə otərəkin rəhatəmat nipitaguihl min.

<sup>20</sup> Nisualkələh, otisiai-in rəhatəmat tata ne mama, məto-inu İərəməərə rəhatat nikin otagien o nolən əh.

<sup>21</sup> Itəmat tata min, esotolən nalpınən taprəkis-in nəratən itəm nisualkələh koatol, məmə nikitat otahmə ron. Məto okəmə nəkoatol nəhlən elat, kən rəhalat nətəligən in otatite.

*Nolən rəha slef ne rəhan iərəməərə*

<sup>22</sup> Slef min, nian rafin onəkotəkəike motol nəwia netəm-iasol min rəhatəmat, məto sənəmə nian

əm itəm ilat koatehm itəmat lan məmə nikitat otətagien otəmat. Məto itəmat onəkotəkəike motol wək e nikitəmat pahrien rəha nos-ipənən nisaiian kəm Uhgin. <sup>23</sup> Wək naka itəm nəkoatol, otol e nikitəmat rafin tahmen-pən əm mə noatol wək rəha İərəməbə rəhatat, sənəmə noatol wək rəha etənim əm. <sup>24</sup> Məto-inu onəkotəkəike motitun wir məmə İərəməbə rəhatat in otos-ipa nətouən ətuatip rəha natimnat min itəm nəkoatol ilat. Nətouən əh Uhgin tinəmən rəkis məmə otos-ipən kəm nenətin min. ?Kən nəkotitun nat u? Nəkotol wək rəha suah inəh İərəməbə pahrien rəhatat, in İərəməbə Kristo. <sup>25</sup> Məto etənim itəm tatol nolən tərət, in otos ətuatip min noan nətouən rəhan o nolən tərət, məto-inu Uhgin, in tatol tahmen-ahmen əm kəm netənim rafin.

## 4

<sup>1</sup> Netəm-iasol min itəm koatərəməbə, onəkotəkəike motol tətutip kən mahmen kəm rəhatəmat slef min, məto-inu itəmat min nəkotəkəike motitun məmə rəhatəmat min Etəm-iasol in tətətig min əpəh e nego e neai.

### *Pol təməgətun ilat*

<sup>2</sup> Itəmat onəkotəkəike moatəghat-pən kəm Uhgin e nəfakən e nian rafin. Kən nian onakoatəfak, rəhatəmat nətəligən otəkəike mətətig lan, kən nian rafin agin nəkotəkəike moatən kəm Uhgin məmə nikitəmat tətəgien o natimnat itəm in təmol kəm itəmat. <sup>3</sup> Kən io iakolkeike məmə itəmat nəkotəkəike motəfak min otimat min, məmə Uhgin

oteräh e suatip mə ekotən-iarəp nalpəkau an-ionən rəha Uhgın e Kristo. Məto-inu ematən-iarəp nəghatən u inu kən kahtosig-in-pən io ron e kalapus. <sup>4</sup> Otəfak məmə iatən-iarəp nəghatən əh tətuatip kən məpiə wır tahmen əm mə ekəike mol mihin.

<sup>5</sup> Itəmat netəm noatəfak, pəs netəm kəsotəfakən kotehm-pən Iesu e nolən min rəhatəmat, kən e nian rafin onəkotəkəike moatehm wır mə nolən, ne nəghatən min rəhatəmat in otiuw Iaihlua min kotuwa o Iesu. <sup>6</sup> Itəmat nəkotəkəike moatəghat wır kəm ilat e nəghatən min əm u itəm təwır kən mətehen, kən pəs ilat okotəto nəghatən min əh mə kotəwır. Kən itəmat onəkotəkəike motitun wır suatip min o nuhalpınən nəghatən min rəhalat itəm koatəpəh o rəhatəmat nahatətəən o Iesu.

### *Pol təmahl-ipən təs mil katian olat*

<sup>7-8</sup> Etahl-ipinə piətət etəm təwır, Tikikas, in tatimnə otəmat o nat kəiu əm məmə in otamnus nəghatən rafin rəhatəmat kəm itəmat, kən in otol nikitəmat təmegəh. In piətət kit itəm io ekolkeike pık. Nian rafin in tatətul matip o nasituən lak e wək rəha İərəmərə. <sup>9</sup> In tatimnə ilau piətət Onesimas. Nian rafin in tətahatətə əskasık e Iesu, kən itəmat ekotolkeike pık in. In etənim kit rəhatəmat. Ilau okuən kəm itəmat namnusən rəha natimnat rafin ikin-u.

### *Namnun nəghatən rəha Pol təmuwin kəm ilat*

<sup>10</sup> Aristakas in tətətig e kalapus itımlau min. In tətahl-ipinə nəghatən wır kəm itəmat. Kən Mak,

in pia Panapas, in min tətahl-ipinə nəghatən wir rəhan kəm itəmat. Itəmat nənamos rəkis rəhak nəghatən ron. Okəmə in otimnə rəhatəmat ikin, kən nakotit motuwın moatehm wir. <sup>11</sup> Kən Josua Jastas, in min tətahl-ipinə nəghatən wir rəhan kəm itəmat. E noanol min rəha Isrel itəm koatahatətə e Iesu, suah miləhal əm əh, iləhal kətəhalasitu lak o wək rəha nego rəha Uhgin. Kən suah miləhal əh, iləhal kətəhalasitu pik lak e nian əskasik min itəm tatuwa e rəhak nəmegəhən.

<sup>12</sup> Epafra in rəhatəmat kit etəmim, in min tətahl-ipinə nəghatən wir kəm itəmat. In etəmim kit nian rafin tatol wək rəha Iesu Kristo, kən e nian rafin in tatəfak əskasik otəmat. In tatətapəh o Uhgin məmə itəmat onakoatətul əskasik kən motimətə motitun wir natimnat rafin itəm Uhgin tolkeike. <sup>13</sup> Ekitun nənən kəm itəmat məmə suah u in tatol wək əskasik o nasituən etəmat, ne netəm Laotisia, ne netəm Hierapolis. <sup>14</sup> Tokita Luk etəm kitat kotalkeike pik, ne suah u Temas, ilau min katuahl-ipinə nəghatən wir kəm itəmat.

<sup>15</sup> Otahl-ipən min rəhak nəghatən wir kəm piətat ne winitat min əpəh Laotisia, ne pətan əh Nimfa, ne netəm koatəfak e nian min rafin əh rəhan ikin. <sup>16</sup> Məto e nian onəkotafin rəkis rəhak naoa un, kən motəike motahl-ipən kəm netəm Laotisia mə ilat okotafin min kəm netəmim rəha niməfak əh-ikin. Kən e nolən kitiah min, itəmat onəkotəkəike motafin min naoa rəha netəm Laotisia. <sup>17</sup> Kən itəmat nəkotəkəike motən-ipən kəm Akipas məmə in otəkəike mol rafin wək itəm ləramərə rəhatat in təmos-ipən kəm in məmə otol.

<sup>18</sup> Io Pol, iatos pen matəte əm e nelmək nəghatən u rəha nənən təwır kəm itəmat. Sotaluinən sen itəm kəməlis io lan e kalapus. Pəs Uhgin otasitu etəmat kən mawte-in rəhan nəwırən tətətig otəmat.

**North Tanna New Testament**  
**The New Testament in the North Tanna Language of**  
**Vanuatu**  
**Le Nouveau Testament dans la langue du Nord Tanna**  
**de Vanuatu**

copyright © 2010 Wycliffe Bible Translators, Inc.

Language: North Tanna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 11 Nov 2022 from source files dated 22 Nov 2019

46e9a2b5-26b8-5301-a079-623f3a20ef8b